

PAAVORO ITIONCAJIAQUENERI

COROSAQUITICA

Antsatantaquemparoca

Ocatica iroguenti antsatantaquemparoca paperi itioncacaantaqueca Paavoro itioncaciaquenerigueti tsaromentajiacarica Jesoshi choocajianquitsica guinteninintsiqui pajitatsica Corosa. Irocashi itioncacotaqueri irira Paavoro otsipaqi paperiqui (Ya. 7.57–8.1; 9.1-31; 13.1–28.31). Tee iroavetempaji Paavoro Corosaqui, cotanquitsi ipintsajiacari tsaromentajiatatsica Corosaquitica, irotaaquequea itioncacaantantajiacanarica (2.1-5), aisa irira Epaperashi icamantaqueri Paavoro quero icojiacani Corosaquitica (1.7-8). Tequeratagueti intioncacaanteroji ocatica paperi, itioncacaantaquero otsipa mavite paperi itigarancaciaquenerica quemisantajiatatsica choocajianquitsica Tesaronicaqui, aisa mavite paperi itioncacaantajiaquenerica Corintoquitica, aisa otsipa paperi itioncacaantajiaquenerica choocajianquitsica quepatsiqui icantajitica Garashia, aisa otsipa irashi quemisantajiatatsica choocajianquitsica Iromaqui. Chooca quenquejajianquitsica tequeratagueti intioncacaantajiaqueneri Corosaquitica, itioncacaantajiaqueneri Piripoquitica. Paavoro itioncacaantaquero 3 paperipae ajagantsiniqui 60, ichooaquegueti santanaqui Iromaqui: aparato itioncacaantajiaqueneri quemisantajiatatsica Epesoquitica, otsipa irashijia Corosaquitica, otsipa irashi Piremoni. Isotoanaquerogueti Tiiquico Iromaqui, yaanaquero ocatica 3 paperipae yoanaquegueti quepatsiqui pajitatsica Ashia.

Ocaniqui paperiqui Paavoro icamantajiaqueri Jesoshi quero incojiaquempani intsipamajajiaquemparigueti Amajirote (3.1–4.6). Itsavetacojiaqueneri Quirishito, iriotaque peacaaroca maasano aisa iriotaque choocatacaaquero, iriotaque agavejamajatatsica yanaajiaqueri maasano (1.15-23). Apaniro iriatimpa yagavejaque iramitacojiaqueri quemisantajiaquenerica incomajamajajiaquempa aatoniji yamatavijajigui tsatacaantamampeajiatatsica (2.6-23).

1 ¹Naroguenti Paavoro itigarancane Jesoquirishito, iriotari nintacaquena Aapani Irioshi. Chocana acaniqui notsipatacari apiguemisantariteni Timoteo. ²Imaica nonintaque nontioncaciaquempi paperi maasano

aviatimpajia choocajiatatsica Corosaqui comajamajajiatatsica quemisantamajajiguirica Quirishito. Namanacoventajiaquempiquea incavintsajajiaquempinijite Aapani Irioshi aisa Amajirote Jesoquirishito, inchoocatacaajiaquempinijite

cameetsa aatonijite pishoshoguiteventajigaro taaca opajitapae.

Paavoro ishineventacari Aapani Irioshi

³Nocancani namanacoventajiaquempi-gueti nocanqueriquea Aapani Irioshi, Iriri Amajirote Jesoquirishito: “Arioteesaa.”
⁴Noquemacojiaquempitari piquemisantamajajiaqueri Quirishito Jesoshi, aisa noquemacojiaquempi pipintsamajajiacari maasano yashintajiacaca, irootaquequea noshinevaetantanacaca. ⁵Piquejetantanacaca imaica poguijacojiaacatarite incavintsajajiaquempi Aapani Irioshi jenoqui inquitequi. Aviatimpajia iroaque-raguetei piquemajiaqueroguetei Quenquetsatsarentsimajaca, piquemaqueguetei irimeshijajiaquempi, ariqueate piquenajiaque poguijacojiaacaca incavintsajajiaquempi. ⁶Ocatica piquemaqueca ojatacoguetaunque otsitacaguetejanacaro maasano quepatsi, icantashitiantajianacaca oshequi caquinte iquejejjiaquempi aviatimpajia piquemisantajiaqueriguetei Aapani Irioshi. Aritarite iroaqueaguetei piquemajiavaqueroguetei aviatimpajia, pitsajiajopojaqueguetei arimaja icavintsajajiaquempi Aapani Irioshi, ariqueate icantashitajiaquempi. ⁷Coramani notigarancaqueri notsipajiacaca Epaperashi nopintsajiacaca itsatacaamajajiaquempiquea Quenquetsatsarentsimajaca, iroomajaca. Iriatimpa iriguentiquea aisa savicaventiroca inintaguetica Quirishito. ⁸Ariquea icoraquetajiguetei icamantapojaquena icanti caaviji pipintsatantajianaca aviatimpajia, yagavejacaajiaquempitari Ishire Aapani Irioshi.

Yamanacoventajiaqueri Corosaquitica

⁹Irootaquequea icamantajiaquena-gueti nocancani namanacoventajia-

quempi nocantajiaqueri Aapani Irioshi iroguiconijajiguempiro ininqueca, intsatacaajiaquempi pintsamajajiaque-niji pishirequi quero pincojiaquempani. ¹⁰Irooquea namanantajiacarica cameetsaniji pagavejajiaqueniji aviatimpajia pinetsanavaejianaquempa, irishineventaquemparoniji maasano pantaguetaqueca. Ariquea pantajiaque taaca opajitapae cameetsaguetsica, aisa pintsamajajiaqueri Aapani Irioshi. ¹¹Namanacoventajiaquempi aisa intampishitacaajiaquempi Aapani Irioshi, iriotarite tampishitacaantamajata-tsica. Nocantiri intampishitacaajiaquempi cameetsaniji pantsiperejacojiaquempaniji maasano, aatoniji pisemarotsi mana pishinevaejiaquempa intati. ¹²Pincanqueri Aapani Irioshi pishinevaejjiaquempa, pitsaquetari imeshiajjiaquempi cameetsaniji pintsipajiaquempariniji maasano tsariventamajajiacarica incavintsajajiaqueriguetei coajica ontaniqui otsirencaguitemajaqueguetei.^a

Jesoquirishito

¹³Coramani iriguenti ashintajiavecaji ampatsini, oquejevetaca aguintenivetacaguetei ontaniqui opitsecamajaqueguetei. Imaica yaavajaji Aapani Irioshi, irioquea ashintajaji Irijanite ipintsamajatacaca, irosati ipeanaca Amajirote. ¹⁴Irioquea metojaventacaji ochovivincajaventanacaji iriraja irooquea yovegaratantacaji cameetsaniji irajaiavajaji Aapani Irioshi iroguipejajeroniji aguempavejajia.

¹⁵Iriaquea Quirishito iquejemajacari Aapani Irioshi teeca inconijateji, yonigaajiacajiri. Iriatimpa iriguenti iriquetica choocatatsica, yanaajiaqueri maasano ipeacaajiacaca. ¹⁶Iriotarite

a 1.12 *Ontaniqui otsirencaguitemajaqueguetei* ocantacotaquero inquite ichooaqueguetei Aapani Irioshi, teeguetei onchoocateji covaequisherentsi.

ipeacaantajigueticana maasano: choocaguetatsica jenoqui inquitequi aisa choocaguetatsica quepatsiqui, conijaguetatsica irisati teeca inconijajigueji, maasano. Iiraquea teeca inconijajigueji chooca imajirojiate, irira itsipa anaantatsica, aisa agavejajiatsica, cotanquitsi iriguenti Quirishito ipeacaantajitacana maasano cameetsaniji irashintajiaquempariniji. ¹⁷Iriatimpa icancani ichoocatiní coramani tequera-tagueti onchoocaguetaji, irioquea aisa netsanamajaquero maasano imaica.

Icanqueri maasano ipeacaacaca:

“Aritaque pincojiaquempani.”

¹⁸Iriotaque iguito quemisantajiaquerica, aatimpajia quemisantajiaquerica aroguenti itsino. Iriotaque meshiajiacaji, irio aisa jivaqueri maasano tancorejajiananquitsineca cameetsaniji irimajirontamajaquempariniji maasano, iranaamajajiaqueriniji. ¹⁹Inchiquiojitarite ininque Aapani Irioshi icantaguitani inquejema-jataquempari iriatimpa. ²⁰Ininque aisa irogameetsatanajeri maasano catsimajiaquerica choocajiatatsica quepatsiqui aisa choocajiatatsica jenoqui inquitequi, irishineventajiajempariniji. Irootaque itigarancantacarica Quirishito osotoajamentajiacajiniji iriraja coroshiqui imetojimentajiacajigueti.

²¹Coramani aviatimpajia tee pintsipashirentajiguempariji Aapani Irioshi, mana picatsimajiaqueri piguenquejanequi, picovaeguishejiacatari. Cotanquitsieua imaica ivetsinantajiajimpi, ²²irooquea yogameetsatantajiaquempani itsino Quirishito imetojamentajiaquempanigueti. Iquejetantacaca imaica cameetsanijite irinejajiacaji netsanajiacaji quejetacanica tee anquempevaetempaji, aatoniji icantajigaji: “Chooca piguempvaere.” ²³Cotanquitsi imaica pinquemisantamajajiaqueroja Quenquetsatsarentsi Oganejencamajatatsica piquemaji-

aqueca iroaqueragueti, aato povashiantajiguiro, aisa aatoja piquemisantajiguirocantashitatigaroca aatoniji pipeacojigaró imeshiajiaquempani Aapani Irioshi. Irootaquequea ocatica Quenquetsatsarentsi imaica itsavetantajitanaqueca otsitacaguetejanacaro maasano. Irootarite nosavicaventaque naatimpa notsavetantaquero.

Paavoro iriguenti amitacojiguirica quemisantajiguirica Quirishito

²⁴Imaica noshinevaeca natsipeventajiaquempanigueti, notsaquetarite irootanaque nonteronquero acaniqui notsinoqui inintacaaquenaca Quirishito: natsipeventajiacari maasano quemisantajiguirica, maasano irirajia iquejetacajiacaca itsino. ²⁵Iriotaque tigarancaquena Aapani Irioshi nosavicaventajiaquempani maasano tsariventajigarica, nontsatacamajajiaquempani maasano Iguenquetsatsare.

²⁶Coramani tee intsajiteroji, iroguentitari yomanavecaro Aapani Irioshi, cotanquitsi imaica imaquero yoguiconijajiaqueneri maasano quemisantajiguirica. ²⁷Ininquetari Aapani Irioshi pintsajiaquero ocatica: iriraquea Quirishito ichoocashirentajiaqueri maasano quemisantajiguirica irioca joriorjia aisa teeca irijorjioigueji, irootaque ichoocashirentantajiaquempani aviatimpajia. Iroompa iranaquempani jenoqui ichoocatigueti pinquejetajempari iriatimpa.

²⁸Iriotaque notsavetantajiaque. Nocantsijiacavari maasano namitacojiaqueri aatoniji icovaeguisheja, aisa notsatacajiaqueri cameetsaniji intsamajajiaqueriniji, intsarotentamajajiaqueriniji Quirishito Jesoshi. ²⁹Jeroquea nosavicaventaquero natsipevencaro, iriguentitari tampishitacaaquena Quirishito, yagavejacaamajaquena.

2 ¹Imaica noninque pintsajiaque oshequi natsipeventajiaquempani namanacoventajiaquempani aviatimpajia,

aisa maasano choocajiatsica Iraorise-
 aqui, aisa maasano teeca irinejajavete-
 naji. ²Noquejetaca imaica cameetsaniji
 pishinejiaquempaniji, aisa pimpintsata-
 vacajaiacquempaniji. Noninque
 pintsamajaque aatoniji ichoocati
 amatavijaquempineca, aisa noninque
 pintsamajajiaqueri Quirishito. Coramani
 tee intsajiteji irio meshiajiacajineca,
 yomaniquerotari Aapani Irioshi,
 cotanquitsi imaica imataquero
 atsajiaque, yonigaajiacajiroitari.
³Iriatimpa Quirishito itsamajataque.
 Apaniro iriatimpa iragavejamajataque
 intsatacaacaji maasano.

Shoshoh yamatavijajitimpitsi

⁴Irooquee nocamantajiaquempi
 cameetsaniji aatoniji yamatavijajitim-
 pitsi, pijijiguirotsi cameetsa icantave-
 quempica. ⁵Tee nontsipajiavetempiji,
 cotanquitsi oshequi noquenquejajia-
 quempi. Noshinevaetaca noquemacojia-
 quempi pitsipatavacajaiianaca cameetsa,
 quisho poamajajianajiri Quirishito,
 paventajianajari. ⁶Imaicaquea imaica
 piquemisantajiaqueritari Amajirote
 Jesoquirishito, picancanija poguijamaja-
 jianaquerija. ⁷Nonquejetacaquempiro:
 oratica panquirentsi irooquee oshipaqui
 anijacaquero, aisa irooquee tampishita-
 caquero. Aisa pinquejejaquempa
 aviatimpajia, quisho poanaqueri
 Quirishito intsatacaquempi, aisa
 intampishitacaquempi. Picancaniquea
 pinquemisantamajajianaqueri, pinqueje-
 tacaajianaquemparo itsatacaajitaquem-
 pica. Picancani pishineventajianaquem-
 pari Aapani Irioshi, pincanqueri:
 "Ariotesaa."

⁸Inchiquiojijata yamatavijajiguimpitsi
 cantashijigaroca iquenquejashigueta-
 caca caquinte; tee ironica inquenque-
 tsatacojigue itsatacaacajica Quirishito,
 iroguenti inquenquetsatacojiaque

yamejigaca caquinte, itsatacaantica
 quepatsiquitica.

⁹Aritarite Aapani Irioshi ichoocatsino-
 majatantacari Quirishito. ¹⁰Imaica
 piquemisantamajajiaqueritari
 Quirishito, tecatsi pincoacojiajempaji
 pinchoocajiajeniji cameetsa, iriotari
 agavejacaquempineca maasano.
 Iriatimpa caaviji yanaanti, yanaajia-
 queri maasano majirontaguevetatsica,
 irirapae anejaqueca aisa teeca irinejaji-
 teji, yagavejamajaquetarite. ¹¹Paventa-
 shirentaquemparigueti iriatimpa,
 quejetaca itotsaiquijitaquempi,
 cotanquitsi teequea iro totsaiquitimpi
 iraco caquinte, irio totsaiquitimpi
 Quirishito pishirequi, ipishoncajimpiro
 pinintaguishevetacaca. ¹²Ariquee
 iviñacajajitaquempiquetari ari oquejetaca
 pitsipajiacari Quirishito yoguijajitaque-
 rigueti yoguijantapinijitarica metojague-
 tatsica, iroompaquea pisotojaatanaji-
 gueti ari oquejetaca pitsipajijaari
 itancorejanajigueti. Pinejajiaqueriquea
 caaviji yagavejamajati Aapani Irioshi,
 iriotari tancorejajiri Quirishito.
 Irootaquequea itancorejantajimpica
 paventajiacarogueti iragavejane.
¹³Coramani pipeacaaguishejiaca
 covaeguisherentsi, quejetaca metojaji-
 aque pishirejia. Tee pintotsaiquivetem-
 paji, cotanquitsi icavintsajajiaquempi
 Aapani Irioshi, itancorejajajimpji,
 quejetaca pitsipajijaari Quirishito
 itancorejajirigueti. Ariquee ipeacotsita-
 jajiro maasano aguempaveerejia.
¹⁴Coramani atsiperejacojiacaro itionca-
 cotanaqueca Moishishini antsajiaque-
 rome cameetsaniji irimeshiajiniji Aapani
 Irioshi, cotanquitsi tee agavejeji irootari
 oacaanacajinemeca camorecariqui.
 Oquejetaca itioncacojiquero antaveta-
 caca covaeguishesetatsica antsipetaquem-
 pameca coajica. Cotanquitsi imetojaven-
 tajiicajigueti Quirishito coroshiqui

imeshijajajaji ipishoncaquero itioncaco-
jitacajigueti aatoniji atsipejajaro
coajica. Quejevetaca yompajacojiquero
coroshiqui. ¹⁵Ontaniqui imetojaventaca-
jigueti coroshiqui, irooquea yagavejan-
tajiacarica maasano agavejaguevetatsica
aisa majirontaguevetatsica, yoguipashi-
ventajiaqueri, inejacaajiaqueri maasano
arimaja yanaamajajiaqueri iriatimpajia
maasano.

**Aatoja piquemisantajiguiri teeca
intsaromentajiguempariji Aapani Irioshi**

¹⁶Imaica aatoja piquemisantajiguiri
cantajiatsica pantajiaque teeca
oncameetsateji irinejajiaquegueti
pishecajiaquemparo irooca pimirajia-
quero icantimentantajitica. Irooca aisa
incanque piquempevaetaca irinejajia-
quegueti tee pishineventajiguemparo
savincaguiteripae ishineventajiacaca
iriatimpajia, iroguentica iroaqueragueti
irisotoaje taai. Iroguentica aisa incanque
tee oncameetsateji pantaqueca irinejaji-
aquerugeti pantajiaque icantimentan-
tajitica irivetsicajitempagueuti savinca-
guiteri imagorejantajitaca. ¹⁷Maasano
oratica isavicaventajiaqueca joriojia
iroguenti mana oquejevetacaró intati
ivaantorite coraquetanquitsineca,
ocantacoqueri Quirishito incoraque-
taque irimeshijajiacaji. Imaicaquea
imaica mataca coraquetaque. Iriguenti
iriamajatatsica. ¹⁸Aatoja piquemisantaji-
guiri irirajia cantajiaquetaquempineca:
“Aatogueti pitsaromentajigari irashivan-
tjijite, çarimpate irimeshijajiaquempi
Irioshi? Teenica pintsajigueji aviatim-
pajia. Naatimpa iroguenti iquenquetsa-
tacaquena Irioshi noguimaanequi,
irootaque notsatantajiacaca.” Maasano
quejejaqueroca imaica iriguenti
amataatsica, mana yaventacojianaca
intati, iroguentitari iquenquejajiaque
irashipae caquinte. ¹⁹Teenicate intsaro-

ventamajajiguempariji Quirishito
Amajirote. Iriotaque tampishitacaajia-
caji maasano quemisantajiguirica
cameetsaniji antsipamajajiaquempari,
arimpaquea antsaromentamajajiana-
quempari quejetaca ininque Aapani
Irioshi.

²⁰Ariquee pitsipajiacarigueti
Quirishito imetojaquegueti, oquejeta-
caro iroguentica pimetojapitsajiaquero
itsatacantajiguica caquinte aatoniji
piquemisantajiro. Iriguenti Quirishito
pinquemisantaque. Imaicaquea imaica
¿quero ocoani piquemisantantajia-
rica teeca intsaromentajiguempariji?

²¹Iriatimpajia icantimentantajiaqueri
irishecaquempari maasanopae iteshipae,
icantajiaque: “Aatoja pishecatai irira,
ari icoca, aisa aatoja pipamitiri. Picogui-
shetatsi.” ²²Cotanquitsi maasano irira
icantimentajiaqueca iriguenti cantimen-
queri caquinte, teenicate irio cantimen-
terine Aapani Irioshi. Iroguenti
ipeacaancarica ashi ashecajiguempaca,
iroompa ashecajiacarigueti tee anejeriji.
²³Irirajia quejejaqueroca imaica ijiqueji
iriatimpa itsajiaque, aisa ijiqueji yantaji-
aque ininqueca Aapani Irioshi, yatsipeji-
acaro itijiqui itijiacagueti, cotanquitsi
iroguenti yamatavijajiacaca. ¿Queroca-
quea incojiguempanti ititantajiacaca?
¿Arimpa agavejaque onchoocatacaajia-
queri cameetsa aatoniji ipeacaaguisheta
teeca oncameetsateji? Mana yaventaco-
jiaca intati.

3 ¹Aviatimpajia itancorejajijimpi
Aapani Irioshi pishirequi quejetaca
pitsipatacari Quirishito yovochantajiri-
gueti, irootaquequea pinquenquejajia-
quero choocaguetsica ontaniqui
jenoqui ichoocatigueti Quirishito:
isavicaque itincamijempequiqui Aapani
Irioshi, itsipatacari imajirontajiacaca-
queate. Pinquenquejajigueroquea
ininqueca iriatimpa. ²Arimpaquea

pinquejejiacquempa imaica pinquenque-
jamajajianaquero choocaguetatsica
jenoqui, aatoquea piquenquejamajaji-
guiro isavijiquitica quepatsiquitica.

³Oquejetacatari pimetojaque, aatoquea
imaica piquejetaja coramani.

Cotanquitsi tancorejanajitari pishire
pintsipajajempariniji Quirishito
Irioshiqui. Omanaca pishire imaica, tee
irinejajiteroji. ⁴Cotanquitsi oncoramani-
tapojajegueti ironigaanquempagueti
Quirishito tancorejajijimpica, ariquea
ironigaantajiaqueri maasano quero
picojiacani, pintsipajiaquempari
poganejencavaequempa.

**Pimpishoncamajajianaqueroja
pipeacaaguishejiavetacaca**

⁵Noncantajiaquempi aatoja papijita-
jiro aisa pipeacaaguishejiavetacaca:
aatoja poashitantajigui; aato piquenque-
tsaguisheti, aisa aato pantaguisheti; aato
piquenquejavijiti teeca oncameetsateji,
aisa aatoja pantajiro piquenquejaguisheshe-
queca; shoshoh aatoja pinevemajataro
ajaararonsi, pishineventamajatarotsi
quejetaca iro Irioshi. ⁶Maasanotarite
quempevaetatsica quejecaroca
incatsimatimentajiaqueri coajica Aapani
Irioshi, teenicate inquemisantajigueriji.
⁷Aisa piquejejiavecarari aviatimpajia
coramani piquempevaeguishejiavetaca
oshequi. ⁸Cotanquitsi imaica pimpishon-
camajatanqueroja maasano teeca
oncameetsateji. Pimpishoncanaqueroja
pitsimajencajia, aatoja picatsimatanta-
jiaji, aatoja picatsimashirentantajiaji,
aatoja picaveantajigui, aisa aatoja
pinijaguishejigui. ⁹Aatoja pamatavijava-
caajiaja, picantashitatanacatari. Tee
pinquempejajempa coramani, pipishon-
caguetanaquerotari pantaguevetacaca.
¹⁰Ariquea icantashitajijajimipi Aapani
Irioshi, aisa imaica igantaga icantashita-
tjajianaquempi cameetsaniji pinquejeji-

jempariniji iriatimpa peacaaquempica
irosati pintsamajajiaqueri. ¹¹Arigueti
atsarovencari Quirishito yamenajiacaji
Aapani Irioshi ari aquejetavacaajia
maasano aatimpajia. Ariquea
iquejejiaca joriojia aisa guiriegojia, ari
iquejetavacaajia. Ari iquejejiaca aisa
quenajiapojatsica otsipaqui guinteni-
nintsi aisa catsimari, itsipajia aisa teeca
irinetsanateroji yamejigaca joriojia tee
intotsaiquijiteriji, ari iquejejiijaari
netsanatiroca. Ariquea iquejetaca aisa
yomperanajitaca, iquejetacari irira teeca
irashintajitempariji. Maasano iquemi-
santajiaquerigueti Quirishito ichoocashi-
rentajiaqueriquea, yamentantajajarica
Aapani Irioshi ari iquejetavacaaca.

Pinchoocajigüe cameetsa

¹²Maasano aviatimpajia ipintsamajaji-
aquempi Aapani Irioshi, icoguijia-
quempi inintacaajiaquempi irashintama-
jajiaquempi, nocantantajiaquempica:
pishimampojanacaventajiaqueri
atsipejianquitsica; pincavintsajante;
aatoja panaavacaga; aatoja pipigatana-
cari catsimajiaquempineca, pinquenque-
tsatacagueri cameetsa; aisa pinquenque-
tsatacagueri cameetsa irasereajiaquem-
pigueti. ¹³Pimpintsatavacaajigüempa
pantisperejacojigüempa. Aatoja
picatsimajigüeri papiguemisanariteni
catsimajiaquempica, iroguenti pimpea-
cotajemparo querocagueti icanquem-
pini. Irira Amajirote imeshajiacaji
imaisantajajiro maasano antavetacaca
teeca oncameetsateji. Ariquea pinqueje-
jiaquempari iriatimpa pimpeacotsita-
jempari papiguemisanariteni. ¹⁴Cotan-
quitsi picancani pimpintsatavacaamaja-
jiaquempa, caavijitari anaantamaja-
taque. Ampintsatavacajiaquempagueti
anquejeshirentavacaajiaquempa.
¹⁵Noninque iroguishinejajiaquempi
Quirishito aatoniji taaca opajita

pishoshoguiveenta, irootaque inintaque Aapani Irioshi iroaqueragueti inintacaaquempigueti pintsipajijajempariniji maasano tsaromentajigarica. Aisa pishineventajiaquempari iriatimpa, pinejaqueritari caaviji icavintsajiaquempi.

¹⁶Pinquenquejamajatapinijiaqueroja maasano icanqueca Quirishito. Pintsatacaavacaajiaquempaja pintampishitavacaajiaquempaja pinquejejaquempari quenquejamajajiguirica Aapani Irioshi. Pamashaiventajiaquerija Aapani Irioshi, pinquenquejajajerija quero icotacani icavintsajaquempigueti. Pamashaijiaquero sarempae yamashaiventirica joriojia coramani, aisa pamashaitacokeri Quirishito, aisa pamashaitacojiaquero otsipapae itsatacaaquempica Ishire Aapani Irioshi. ¹⁷Taaca opajitapae pantajiaque aisa taaca opajitapae pincantajiaque pinquenquejajiaquerija Amajirote Jesoshi, irooquea pantajiaque ininqueca iriatimpa. Aisa picancani pishineventajiaquempari Aapani Irioshi, pincanqueri caaviji icavintsajanti, itigarancaqueritari Jesoshi.

Quero incojiaquempani tsaromentajigarica inchoocajiaquegueti cameetsa

¹⁸Aviatimpajia manquigarentsijia, pinquemisanqueri manquigatimpica aatoja pipigatsatari, irootaquetari ininqueca Amajirote. ¹⁹Aviatimpajia shiramparijia, pimpintsamajaquemparo pimanquigare aato picatsimajiguiro. ²⁰Aviatimpajia chaajaniquiguentanquitsica, irosatija pinquemisantajiaqueri piri aisa piniro, irootaquetari ishineventaca Amajirote. ²¹Aviatimpajia choocajiatatsica pirijanite irooca porijanite, pintsatagueri cameetsa. Aato picantimentashitari intati. Arica pincantimentashiquempariqueti intati aato inintajiaquemisantajimpi. ²²Aviatimpajia

yashintajitaca, pinquemisantamajaquerija ashintimpica acaniqui quepatsiqui, pantajiaqueroja maasano querocaca incantajiaquempica, cotanquitsi aato apatiro piquemisanti pamenajiaqueri iramenajiaquempigueti poguishinejimenqueriniji, picancani pinquemisanqueri, iriguentitari pinquenquejaque Aapani Irioshi poguishinejantaquemparica. ²³Maasano taaca opajita pantajiaque pishinejiaquempa quejetaca iriotaque pantajiaquene Amajirote, pintampishiventeneri teenica apatiro pamitacoqueri omperatimpica. ²⁴Pitsajiaque icavintsajaquempi Amajirote Quirishito irovegaramajajiaquempiro ontaniqui jenoqui, iriotaquetari pantajiaquene. ²⁵Cotanquitsi iriraquea covaequishetatsica inchiquiojita inquejetacaanquempa iriatimpa irantsipevaequempa, yamenajiacajitari Aapani Irioshi maasano ari aquejetavacaaca.

4 ¹Chocaguete caquinte povegarataqueca pashintacaca, pincavintsajiaquerija, choocatarite ashintajiaquempica aviatimpajia aisa ontaniqui jenoqui inquitequi.

²Imaica noncantajiaquempi maasano aato piperajiga pamanajigueriguete Aapani Irioshi, pinquenquejamajajiguero, aisa picancani pishinevenquempari pincanqueri: “Ariotesaa.” ³Aisa pamanacomentajiaquena naatimpajia cameetsaniji nagavejamajajiaqueniji nontsavetantajiaqueri Quirishito noncamantajiaqueri maasano quero icotani imeshiantiguete, irootaque yashitacotantajivequenaca. ⁴Pamanacomentajiguena cameetsaniji quishoniji nontsavetacotantamajataqueriniji noguisotoajiaqueneriniji maasano, irootaquetari inintacaaquenaca Aapani Irioshi.

⁵Aviatimpajia pintsipajiaquempariqueti teeca intsaromentajiguemparijia

Amajirote, pinchoocajiaquequea cameetsa, pinquenquetsatacaajiaqueri cameetsa aatoniji icatsimajiguimpi. Aatoquea pichoocataashijiga intati. ⁶Aatoja piquenquetsatashijiga intati jeoc jeoc jeoc. Cameetsaja pinquenquetsajiaque cameetsaniji iriniquenquemisantamajiaquempi, aisa pinquenquejamajaque cameetsaniji pintsajiaqueniji querocaca pincanqueri taaca coacoajiaquempine.

Itioncacoqueri Tiiquico

⁷Imaica nontigarancaqueri apiguemisantariteni Tiiquico nopintsajiacaca, iroanaque pinchoocajiaquegueti, irosati incamantajiaquitempi quero ocoani acaniqui nochoocajiaquegueti. Iriatimpa iriguenti caaviji yamitanti. Iriroquea notsipataca nantajiguinirigueti Amajirote. ⁸Iroguenti nontigarancantaquemparica ashi iroguishinejajiaquitempi pinquemacotantajiajenaca choocaturajana. ⁹Iriguenti intsipatanaquempa apiguemisantariteni Oneshimo nopintsajiacaca conoajiavetaquempica. Aisa iquejetaca iriatimpa iriguenti quemisantamajatsica. Iriatimpajia iriotaque camantajiaquempineca maasano.

Ovegarapojaca itioncaquenerica

¹⁰Iriroquea Arishitarico notsipatacaca nashitacojiacagueti ininque pinquemacojajeri chooca iquenquejajijimpi. Aisa iquejetaca Maricoshi iriguentijeguitsorite Verenave,^b iquenquejajijimpi iriatimpa. Imaica noncantajiajempí aisa, arigueti iroanaque irinejajiaquitempi

cameetsaja paajiavaqueri. ¹¹Jeri irira Jesoshi icantajitica aisa Joshito, ininque pinquemacotajeri chooca iquenquejajijimpi. Ichoocajiaqueta oshequini joriojia quemisantajiguirica Quirishito, cotanquitsi apaniroquea iriatimpajia itsipajiaquena notsavetantigueti nocamantajiaquerigueti maasano quero icocani Aapani Irioshi imajirontagueti. Oshequi yoguishinejajiaquena.

¹²Iriroquea pignonoro Epaperashi ininque pinquemacotajeri chooca iquenquejajijimpi. Irio irisati antavaetinirica Jesoquirishito. Irosati yamanacoventajiaquempi picancaniniji pintsarovenquempari Quirishito Jesoshi aisa pintsamajiaqueroniji maasano ininquea Aapani Irioshi. ¹³Nonejaqueritari yatsipeventamajiaquempi aviatimpajia, aisa yatsipeventajiacari irirajia Iraoriseaquitica aisa irirajia Yeraporishiquitica. ¹⁴Aisa ichooaque acaniqui aavintantatsica Irocashi, caaviji ipintsajitari. Ininque pinquemacotajeri chooca iquenquejajijimpi. Aisa iquejetaca Temashi.

¹⁵Pincamantajigueri apiguemisantarijeniteni choocajitsica Iraoriseaqui choocana noquenquejajijiri. Pinquejetaquempa pincamantero iroatimpa Nimpa, aisa maasano quemisantatsica capiocajianquitsica otsovironaquitequi, pincamanquerija choocana noquenquejajijiri iriatimpajia aisa. ¹⁶Pinteroncaquerogueti pampatsajavanquerogueti ocativa notioncaqueca imaica, pintigarancajiaquenerija quemisantajitsica choocajitsica Iraoriseaqui irampatsajavanqueri iriatimpajia, iroompa iriatimpajia impacaanquempiro

b 4.10 *iriguentijeguitsorite Verenave*. Omanaca oguipitsocaquerogueti ocativa tioncanquitsica acaniqui guiriegotsaqui: ocanti *anepsios*. Agavejaque ojicotaqueri irioca itineri, irioca aisa iranianishite, irioca iriguentijeguitsorite Verenave. Yoguipitsocaquerogueti quimajareri versión Reina Valera icanti “el sobrino de Bernabé”, ancanque “itineri”. Yoguipitsocaquerogueti quimajareri Versión Popular icanti “el primo de Bernabé”, ancanque irooca “iranianishite” irooca “iriguentijeguitsorite”.

notioncacaantajiaquenerica, aviatimpa-
quea pampatsajavantajivaquero.

¹⁷Pincantajigueri Arequipo: “Pisavicaven-
tavaetanaquero maasano inintacaaquem-
pica Amajirote, pimoncaramajaquero.”

¹⁸Naroguenti Paavoro, jeroquea inchiquio-
jita notioncajiaquempiro oca nacoqui.
Pinquenquejajajena choocatirajana
yashitacojitaquena. Nonintaque incavintsaja-
majajiaquempiquea Aapani Irioshi.